



Inatsisartuni ilaasortaq Aqqa Samuelson, Inuit Ataqatigiit  
/maani

**Qarmasissianik tikisitsisarneq pillugu § 37 naapertorlugu apeqquteqaammut  
2018-323-mut akissut**

23-01-2019  
Suliaq nr.: 2018 - 26797  
Id nr. 37684012

Asasara Aqqa Samuelson

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
Fax: (+299) 34 63 56  
www.naalakkersuisut.gl

Inatsisartut suleriaasianni § 37 naapertorlugu apeqquteqaatinut nassiussannut qujanaq.  
Apeqqutit matuma kinguliani ataasiakkaarlugit allanneqarput, akissummillu  
malitseqarlutik.

**1. Qarmasissiaq nunanit allanit pissarsiarineqartartoq qanoq annertutigisoq  
nunatsinnut tikisinneqartarpa? Aningaasanngorlugu tamanna qanoq naleqarpa?**

Akissut: Kalaallit Nunaannut pilersuisuusut ilisimatitsipput, ukioq allortarlugu imaluunniit  
ukiut sisamakkaarlugit qarmasissiat amerlanerpaamik 450-it tikisinneqartartut. Taakku  
taamaallaat pujoorfinnik oqaluffillu naqqinik iluarsaassinermut atorneqartarput.  
Taamaattumik tikisitsisarnermi nalingat appasissorujussuuvoq.

**2. Nunatsinni illuliornermi qarmasissiaq qanoq annertutigisumik atugaatigiva?**

Akissut: Apeqqut 1-imut akissut takuuk.

**3. Qarmasissiamik illuliaq qisummik illuliamut sanilliullugu qanoq  
annertutigisumik sipaarutaasinnaanera misissuiffigineqarsimava?**

Akissut: Naatsorsuineri takutinneqarpoq, qarmasissianik illuliornermi sanasumut  
aningaasartuutit nalinginnaasumik qisunnik illuliamut assingusumut naleqqiullutik 25  
procentinik amerlanerusartut. Tassalu illuliornermut akinut toqqaannartumik  
naleqqiullugu qisunnik illuliamut taarsiullugu qarmasissianik illuliamik sanasoqarnerani  
sipaaruteqartoqarsinnaangilaq.

**4. Qarmasissiamik illuliat issittumi avatangiisinut naleqqussusaat  
ilisimatusarnikkut misissuiffigineqarsimappat?**

Akissut: Qarmasissiat atorlugit illuliat issittumi avatangiisinut naleqqunnersut  
ilisimatusarnikkut misissuineri ingerlatsisoqarsimanersoq Naalakkersuisunit  
ilisimaneqanngilaq.

**5. Nunatta pissarititai atorlugit qarmasissialiornermik misileraasoqarsimava? Ass.  
Kangerlussuup marraa?**

Akissut: Naalakkersuisut misileraalluni suliat pillugit nalunaarusianik  
tigusaqarsimanngillat, aammalu nalunaarusianik taamaattunik  
saqqummersitsisoqarsimanersoq ilisimaneqanngilaq.

Kisiannili 2005-ip missaani DTU/Artek Kangerlussuarmit marrarnik qarmasissianik sanaartorsimasoq Naalakkersuisut ilisimavaat. Kangerlussuarmit marrarnik Danmarkimi qarmasissiorfimmu nassiussisoqarpoq, tassanilu marraq qarmasissialiassa qarmasissialiorfiup kissarsuutaani 1.000 °C-it missaannik kissassusilimmi uunneqarpoq.

Tamatuma kingorna qarmasissialiat Kalaallit Nunaanneersut Danmarkimi qarmasissialiorfimmu Sisimiunut nassiunneqarput, qarmasissiallu sisorartartut peqatigiiffiata SSP-p ilaasortanut illuata sananeqarneranut atorneqarput.

Tamatuma kingorna qarmasissiat kaanngalasut aammalu qarmasissiat qulloortitertut takuneqarsinnaalerpoq. Tamatumunnga pissutsit arlallit pequtaapput, ilaatigut marraq tarajoqassusia, kiisalu qarmasissiat isugutammik milluaanerat, tamatumalu kingunerisaanik qarmasissiat qerinerminni qulloornerannut pequtaasimagunarluni.

**6. 2015-imi Kommune Kujalleri Inuussutissarsiornermut, Suliffeqarnermut, Niuernermit Nunanullu Allanut Naalakkersuisoq Vittus Qujaukitsoq aamma Kommune Kujalleri borgmesteri Jørgen Wæver Johansen, kiisalu Inuussutissarsiornermut Suliffeqarnermullu Ataatsimiititaliami ilaasortat ulluni marlunni Kujataani suliffeqartitsinerup annertusarsinnaanera pillugu isumasioqatigiissimapput. Tamanna Namminersorlutik Oqartussat nittartagaanni uani atuarneqarsinnaavoq:**

**[https://naalakkersuisut.gl/da/Naalakkersuisut/Nyheder/2015/08/170815\\_byggematr\\_ialer](https://naalakkersuisut.gl/da/Naalakkersuisut/Nyheder/2015/08/170815_byggematr_ialer)**

**Isumasioqatigiittoqareernerata kingorna suliniut Siku Block pillugu qanoq ingerlariaqqittoqarsimanersoq Naalakkersuisut annertunerusumik paasissutissiisinnappat?**

Akissut: 2015-imi isumasioqatigiinneq suliffeqarfinnik pilersitsinissamut tunngasuuvoq. Inuussutissarsiornermut Naalakkersuisoqarfik ilisimatitsivoq, 2015-imi isumasioqatigiinneq tunngavigalugu allanik suliaqartoqarsimanngitsvoq.

**7. Nunatsinni nunap immikkoortuini qarmasissiamik pilersuinissamut periarfissagissaartunik misissuisoqarsimava?**

Akissut: Ineqarnermut Attaveqatigiinnermullu Naalakkersuisoqarfik misissuineramik taamaattumik ilisimasaqanngilaq.

**8. Nunatsinni qarmasissialiorfimmik pilersitsinissamut Naalakkersuisut pilersaaruteqarpat?**

Akissut: Naalakkersuisut qarmasissianik pisortatigoortumik tunisassiornermik aallartitsinissamik pilersaaruteqanngillat, tamanna pissappat aallarniartut namminersortut toqqaannartumik unammillerneqalissammata.

**9. Nunatsinni qarmasissialiorfimmik pilersitsisoqassappat, tamanna qanoq annertutigisumik aningaasanik naleqassava?**

Akissut: Naalakkersuisut qarmasissianik tunisassiorfimmik pilersitsinissamut aningaasartuutissanik naliliisimangillat. Tamanna Naalakkersuisut suliaasaannut ilaangilaq.

**10. Nunatsinni qarmasissialiorfimmik pilersitsinikkut suliffiusinnaasut suut qanorlu amerlatigisut pilersinneqarsinnaappat? Qarmasissialiorfimmi sulisorineqartussat qanoq ilinniagallit pisariaqartinneqassappat?**

Akissut: Apeqqut 9-mut akissut takuuk.

**11. Sanaartornerup iluani nunatta avataaniit pilersorneqara annikillisarluarlu Naalackersuisut qanoq pilersaaruteqarpat?**

Akissut: Nutaanik sanaartornermi atortunik immikkoortunillu, najukkami tunisassiornissamut tapertaasunik atuinissaq pingaartinneqartarpoq. Siunnersortit entreprenørillu ukiuni kingullerni ataatsimoorlutik betoninik immikkoortunik pisariitsunik, sanaartukkani aalajangersimasuni atugassanik ineriartortitsisimapput. Betonit immikkoortut taakku nunatta nammineerluni pissarititai, soorlu sioqqat ujaraaqqallu atorlugit tunisassiarineqartarput, kisiannili cementinik saviminernillu qajannaqqutinik tikisitanik atuiffiusarlutik.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Karl Frederik Danielsen